



REPUBLIKA E SHQIPËRISË

KOMISIONERI PËR TË DREJTËN E INFORMIMIT DHE MBROJTJEN E TË  
DHËNAVE PERSONALE  
DREJTORIA PËR MBROJTJEN E TË DHËNAVE PERSONALE

Nr. 118/3Prot.

Tiranë më 7.02.2019

REKOMANDIM

Nr. 05, datë 7.02.2019

PËR KONTROLLUESIN “AGJENCIA PËR ZHVILLIM BUJQËSOR DHE  
RURAL”

Në mbështetje të neneve 29, 30, 31 pika 1 gërma a/1, dhe 32 të ligjit nr. 9887 datë 10.03.2008 “Për Mbrojtjen e të Dhënave Personale”, i ndryshuar, neneve 77-112 të Ligjit nr. 44/2015 “Kodi i Procedurave Administrative të Republikës së Shqipërisë”, si dhe provave të administruara në ngarkim të kontrolluesit “Agjencia për Zhvillim Bujqësor dhe Rural”,

KONSTATOVA SE:

Në zbatim të Urdhrit Nr. 21 datë 23.01.2019 të Komisionerit për të Drejtën e Informimit dhe Mbrojtjen e të Dhënave Personale, u krye hetimi administrativ pranë kontrolluesit “Agjencia për Zhvillim Bujqësor dhe Rural”, me objekt:

- Zbatimi i Nenit 18 të ligjit nr. 9887 datë 10.03.2008 “Për Mbrojtjen e të Dhënave Personale” i ndryshuar, dhe akteve të miratuara nga Komisioneri në lidhje me mbledhjen, përpunimin, ruajtjen dhe sigurinë e të dhënave personale.

Agjencia për Zhvillim Bujqësor dhe Rural është institucion qendror publik, në varësi të Ministrisë së Bujqësisë dhe Zhvillimit Rural dhe ushtron veprimtarinë në fushën e zhvillimit bujqësor dhe rural në Shqipëri duke mbështetur sipërmarrësit në sektorin ushqimor, për përfitimin e fondeve nga buxheti i shtetit dhe Bashkimi Evropian.

Nga verifikimi i kryer në vend, rezultoi se:

1. Kontrolluesi nuk ka “Njoftuar” Zyrën e Komisionerit në lidhje me përpunimin e të dhënave personale, në zbatim të neneve 21 dhe 22 të ligjit nr. 9887/2008 “Për mbrojtjen e të dhënave personale” i ndryshuar.  
Konstatimi përbën shkelje administrative të pikës 1 të nenit 21 dhe nenit 22 të ligjit nr. 9887/2008 “Për mbrojtjen e të dhënave personale” i ndryshuar: “...Njoftimi duhet të bëhet para se kontrolluesi të përpunojë të dhënat për herë të parë ose kur kërkohet

*ndryshimi i gjendjes së njoftimit të përpunimit, sipas nenit 22 të këtij ligji, të njoftuar më parë”.*

2. Kontrolluesi ka vendosur një rubrikë “*Politikat e Privatësisë*” në portalin <http://www.azhbr.gov.al>, me qëllim informimin e subjekteve të të dhënave të cilët aksesojnë këtë portal, por konstatohet nevoja për t’u plotësuar. Informacioni i publikuar në “*Politikat e Privatësisë*”, duhet të ketë për qëllim informimin e subjekteve të të dhënave që vizitojnë këtë portal, mbi mënyrat e përpunimit të të dhënave, masat e sigurisë, ruajtjen e konfidencialitetit, të drejtat e subjekteve të të dhënave dhe detyrimet e kontrolluesit në kuadër të mbrojtjes së privatësisë.

Konstatimi përbën shkelje administrative të nenit 18 të ligjit, pika 1: *Kontrolluesi, kur mbledh të dhëna personale, duhet të informojë subjektin e të dhënave për fushën dhe qëllimin, për të cilin do të përpunohen të dhënat personale...*” dhe Vendimit nr. 6/2013 “*Për përcaktimin e rregullave të hollësishme për sigurimin e të dhënave personale*”.

3. Formulari i aplikimit në skemat financuese për zhvillimin bujqësor dhe rural, përmban të dhëna personale të aplikantit, por konstatohet nevoja për t’u plotësuar me referencën ligjore mbi të drejtat e subjekteve të të dhënave dhe detyrimet e kontrolluesit (AZHBR) në kuadër të mbrojtjes së këtyre të drejtave.

Konstatimi përbën shkelje administrative të nenit 18 të ligjit, pika 1: *Kontrolluesi, kur mbledh të dhëna personale, duhet të informojë subjektin e të dhënave për fushën dhe qëllimin, për të cilin do të përpunohen të dhënat personale...*”

4. Konstatohet se kontrolluesi informon nëpërmjet tabelave subjektet e të dhënave “*nëpunës*”, “*vizitorë*”, etj., mbi prezencën e sistemit të video-survejimit (CCTV) megjithatë, tabelat nuk janë të plotësuara në përputhje me formatin e miratuar sipas Udhëzimit nr. 3 të Komisionerit “*Për përpunimin e të dhënave personale me sistemin e video survejimit në ndërtesa dhe mjedise të tjera*”. Modeli standard i miratuar ka për qëllim informimin e subjekteve të të dhënave, mbi përpunimin e të dhënave imazhe-video, ushtrimin e të drejtës së subjekteve të të dhënave në rast të cenimit të privatësisë etj.

Konstatimi sa i përket informimit jo të plotë të subjekteve të të dhënave, mbi qëllimin e përpunimit të të dhënave, ushtrimit të të drejtave, të drejtën e ankimit etj., gjatë përpunimit e të dhënave personale imazhe-video nëpërmjet sistemit të video-survejimit (CCTV) nga kontrolluesi, përbën shkelje administrative të nenit 18 të ligjit dhe Udhëzimit Nr.3/2010 të Komisionerit “*Për përpunimin e të dhënave personale me sistemin e video-survejimit në ndërtesa dhe mjedise të tjera*”.

Në përfundim të hetimit administrativ, referuar provave dhe konstatimeve në vend, grupi i kontrollit hartoi dhe nënshkroi në prani të palëve procesverbalin e hetimit administrativ. Lidhur me konstatimet e grupit të hetimit administrativ, përfaqësuesit e kontrolluesit nuk patën kundërshtime por deklaruan se brenda 5 ditëve do të merren masat për plotësimin e detyrimeve ligjore.

Sa më sipër, në zbatim të neneve 18, 21, 29, 30, 31 dhe 32 pika 1 të Ligjit Nr. 9887 datë 10.03.2008 “Për mbrojtjen e të dhënave personale”, i ndryshuar,

### REKOMANDOJ:

1. Kontrolluesi “Agjencia për Zhvillim Bujqësor dhe Rural” në zbatim të nenit 18 të ligjit nr. 9887 datë 10.03.2008 “Për Mbrojtjen e të Dhënave Personale”, të informojë subjektet e të dhënave mbi përpunimin e të dhënave personale, qëllimin e përpunimit, mjetet dhe mënyrat e përpunimit, përhapjen e të dhënave etj., nëpërmjet “Politikës së Privatësisë” në portalin zyrtar <http://www.azhbr.gov.al>.
2. Kontrolluesi “Agjencia për Zhvillim Bujqësor dhe Rural” në zbatim të neneve 21 dhe 22 të ligjit nr. 9887/2008 “Për Mbrojtjen e të Dhënave Personale” i ndryshuar, të kryejë pranë Zyrës së Komisionerit “Njoftimin” në lidhje me përpunimin e të dhënave personale, për të cilat është përgjegjës.
3. Kontrolluesi “Agjencia për Zhvillim Bujqësor dhe Rural”, të kryejë të gjitha detyrimet që burojnë nga ligji dhe nga ky akt, brenda një afati 10 ditor nga momenti i marrjes dijeni dhe të njoftojë me shkrim Zyrën e Komisionerit për masat e marra. Përbushja e këtyre detyrimeve nga kontrolluesi, përbën objekt kontrolli të vazhdueshëm nga Zyra e Komisionerit.
4. Në rast mos përbushje të detyrimeve të caktuara, Komisioneri vepron sipas nenit 30/2 dhe 39 të ligjit nr. 9887 datë 10.03.2008 “Për Mbrojtjen e të Dhënave Personale”, i ndryshuar. Komisioneri në rast shkeljesh serioze, të përsëritura ose të qëllimshme të ligjit nga një kontrollues ose përpunues, veçanërisht në rastet e përsëritura të moszbatimit të Rekomandimeve të tij, vendos sanksion me gjobë për kundërvajtjet administrative dhe e denoncon publikisht ose e raporton çështjen në Kuvend dhe në Këshillin e Ministrave.

Ky Rekomandim u shpall sot më datë, 7.2.2019

**KOMISIONERI**

**Besnik Dervishi**

